

四庫全書

集部

欽定四庫全書

古樂苑卷四十四

明 梅鼎祚 編

雜歌謠辭

漢歌

平城歌

漢書曰高祖自將兵三十二萬擊韓王信帝先至平城步兵未盡到冒頓縱精

兵三十餘萬圍帝於白登七日漢兵中外不得救餉樊噲時為上將軍不能解圍天下皆歌之後用陳平秘計得免白登

在平城東南去平城十餘里

平城之下亦誠苦七日不食不能發弩

下一作圓

畫一歌

一作百姓歌漢書曰惠帝時曹參代蕭何為相國初高帝與何定天下法令既

明具及參守職舉事無所變更  
一遵何之約束於是百姓歌之

蕭何為法講若畫一曹參代之守而勿失載其清靖民

以寧一

講史記作類又一作觀  
又一作較靖史記作淨

淮南民歌

漢書曰淮南厲王長高帝少子也長廢法不執文帝不忍置於法迺載以

輜車處蜀嚴道邛郵遣其子子母從居長不食而死後民有作歌歌淮南王帝聞之乃追

尊淮南王為厲王

置園如諸侯儀

一尺布尚可縫一斗粟尚可舂兄弟二人不相容

一尺繒好童童一升粟飽蓬蓬兄弟二人不能相容

高誘作鴻烈解叙及

許叔重注其辭云

### 衛皇后歌

漢書曰衛子夫為皇后弟青貴震天下歌之

生男無喜生女無怒獨不見衛子夫霸天下

### 鄭白渠歌

史記曰韓開秦之好興事欲罷無令東伐迺使水工鄭國間說秦令鑿涇

水自中山西邨瓠口為渠竝北山東注洛漑  
烏鹵之地四萬餘頃因名曰鄭國渠漢書云  
大始二年趙中大夫白公復秦穿渠引涇水  
首起谷口尾入櫟陽注渭中袤二百里溉田  
四千五百餘頃名曰白  
渠民得其饒歌之曰

田於何所池陽谷口鄭國在前白渠起後舉鍾如雲決渠為雨湮水一石其泥數斗且溉且糞長我禾黍衣食

京師億萬之口

漢紀為雨下有二句云水流竈下魚跳入釜起作為億萬之口作百萬餘口

潁川歌

漢書曰灌夫不好文學喜任使已然諾諸所與交通無非豪傑大猾家累數千

萬食客日數十百人陂池田園宗族賓客為權利橫潁川潁川兒歌之

潁水清灌氏寧潁水濁灌氏族

匡衡歌

漢書曰衡字稚圭東海承人也世農夫至衡好學家貧傭作以供資用尤精力

過絕人諸儒為之語

無說詩匡鼎來匡說詩解人顧

牢石歌

一作印綬歌漢書任辛傳曰元帝時宦官石顯為中書令與僕射牢梁少府五

鹿亢宗結為黨友諸附倚者皆得寵位民歌之言其兼官據勢也

牢邪石邪五鹿客邪印何累累綬若若邪

五侯歌

漢書曰成帝河平二年悉封舅大將軍王鳳庶弟譚為平阿侯商為成都侯立

紅陽侯根曲陽侯逢時高平侯五人同日封故世謂之五侯時五侯羣弟爭為奢侈後庭姬妾各數十人羅鐘磬舞鄭女作優倡狗馬逐馳大治第室起土山漸臺洞門高廊閣道連屬彌望百姓歌之言其奢侈如此按傳稱成都侯穿長安城引內澧水注第中大陂曲

陽侯第園中土山漸臺類白虎殿則穿城引  
水非曲陽與歌辭不同高都外杜皆長安里  
名

五侯初起曲陽最怒壤決高都連竟外杜土山漸臺西  
白虎

樓護歌

漢書曰樓護字君卿為京兆吏數年甚  
得名譽與谷永俱為五侯上客母死送

葬者致車二三千  
兩問里歌之曰

五侯治喪樓君卿

尹賞歌

漢書曰賞字子心鉅鹿楊氏人永始元  
延問上怠於政貴戚驕恣交通輕俠藏

匿亡命長安中姦猾沒多羣輩殺吏受賕報  
警賞以三輔高第選守長安賞至修治長安  
獄穿地方深各數丈致令辟為郭以大石覆  
其口名為虎穴乃收捕輕薄少年惡子得數  
百人內穴中覆以大石百日後令死者家  
自發取親屬號哭道路歔歔長安歌之曰

安所求子死桓東少年場生時諒不謹枯骨後何葬

上郡歌

漢書曰成帝時馮野王為上郡太守其  
後弟立亦自五原太守徙西河上郡立

居職公廉治行畧與野王相似而多知有恩  
貸好為條教吏民嘉美野王立相代為太守

歌之  
曰

大馮君小馮君兄弟繼踵相因循聰明賢知惠吏民政



如魯衛德化鈞周公康叔猶二君

張君歌

後漢書曰張堪光武時為漁陽太守捕擊姦猾賞罰必信吏民皆樂為用乃於

狐奴開稻田八千餘頃勸民耕種以致殷富百姓歌之

桑無附枝麥穗兩岐張君為政樂不可支

朱暉歌

後漢書曰暉字文季建武中再遷臨淮太守好節槩有所拔用皆屬行士諸報

怨以義犯率皆為求其理多得生濟其不義之囚即時僮仆吏人畏愛為之歌曰

彊直自遂南陽朱季吏畏其威民懷其惠

涼州歌

一作樊曄歌後漢書曰曄光武時為天水太守政嚴猛好申韓法善惡立斷人

有犯其禁者率不生出獄吏人及羌胡畏之道不拾遺涼州為之歌

遊子常苦貧力子天所富寧見乳虎穴不入冀府寺大笑期必死忿怒或見置嗟我樊府君安可再遭值

董宣歌

後漢書曰董宣字少平光武時為洛陽令搏擊豪強莫不震懷京師號為卧虎

歌之云

枹鼓不鳴董少平

郭喬卿歌

後漢書曰郭賀字喬卿建武中為尚書令在職六年拜荊州刺史到官有

殊政百姓歌之

厥德仁明郭喬卿中正朝廷上下平

上下一作天下

費貽歌

常璩華陽國志曰費貽字奉君南安人也公孫述時漆身為厲佯狂避世述破

為合浦守蜀

中歌之曰

節義至仁費奉君不仕亂世不避惡君脩身於蜀紀名

亦足後世為大族

三句疑非歌語

鮑司隸歌

列異傳曰鮑宣宣子永永子昱三世皆為司隸而乘一驄馬京師人歌之

云

鮑氏驄三人司隸再入公馬雖瘦行步工

通博南歌

一題作行者歌後漢書西南夷傳曰永平十二年哀牢王柳貌遣子率種

人內屬顯宗以其地置哀牢博南二縣割益州郡西部都尉所領六縣合為永昌郡始通

博南山度蘭倉水

行者苦之作歌

漢德廣開不賓度博南越蘭津度蘭倉為它人

漢書注倉作滄

廉范歌

後漢書曰廉范字叔度建初中為蜀郡太守成都民物阜盛邑宇偏側舊制禁

民夜作以防火災而更相隱蔽燒者日屬范乃毀削前令但嚴使諸水而已百姓為便乃

歌之

云

廉叔度來何暮不禁火民安作平生無襦今五袴

民安作東

觀記作入安堵平生無襦今五袴華陽國志作來  
時我單衣去時重五袴又一作昔無襦今五袴

喻猛歌

和帝時蒼梧太守以  
清白為治郡頌之曰

於惟蒼梧交趾之域大漢唯宗遠以仁德

陳紀山歌

華陽國志曰巴郡陳紀山為漢司隸  
校尉嚴明正直西虜獻賁工廷試之

分公卿以為嬉紀山獨不視京師  
稱之巴人歌曰紀山陳禪字

築室載直梁國人以貞貞邪娛不揚目枉行不動身奸  
軌僻乎遠理義協乎民

黎陽令張公頌

見故迹  
遺文

公與守相駕蜚魚往來倏忽遠熹娛慰此屯民寧厥居

魏郡輿人歌

岑熙為魏郡太守招聘隱逸與參政事無為而化視事二年輿人歌

之

我有枳棘岑君伐之我有蝨賊岑君遏之狗吠不驚足  
下生麇含哺鼓腹焉知凶災我喜我生獨丁斯時美矣  
岑君於戲休茲

吳資歌

常璩華陽國志曰太山吳資字元約孝順帝永建中為巴郡太守屢獲豐年人

歌之曰云云及資遷去人思資又歌曰吳資

習習晨風動澍雨潤禾苗我后恤時務我人以優饒  
望遠忽不見惆悵當徘徊恩澤實難忘悠悠心永懷

范史雲歌

後漢書曰范丹字史雲桓帝時為萊  
蕪長遭母喪不到官後遁身於梁沛

之問徒行敝服賣卜於市遭黨人禁錮遂推  
鹿車載妻子拮拾自資所止卑陋有時絕粒  
窮居自若言貌無改閭里歌  
之冉袁山松後漢書作丹

甌中生塵范史雲釜中生魚范萊蕪

陳臨歌

謝承後漢書曰陳臨字子然為蒼梧太  
守人適腹子報父怨捕得繫獄傷其無

子令其妻入獄遂  
產得男人歌曰

蒼梧陳君恩廣大令死罪囚有後代德參古賢天報施

又

蒼梧府君惠及死能令死人不絕嗣

劉君歌

後漢書曰劉陶字子奇潁川潁陰人濟北貞王勃之後桓帝時舉孝廉除順陽

長縣多姦猾陶到官宣募吏民有氣力勇猛能以死易生者得數百人皆嚴兵待命於是覆案姦軌所按發若神以病免吏民思而歌之

邑然不樂思我劉君何時復來安此下民

賈父歌

後漢書曰中平元年交趾屯兵執刺史及合浦太守靈帝敕三府精選能吏有



司舉賈琮為交趾刺史琮到部訊其反狀咸  
言賦歛過重民不聊生故聚為盜琮即移書  
告示各使安其資業招撫荒散蠲復徭役誅  
斬渠帥為大害者簡選良吏試守諸縣百姓  
以安巷路  
為之歌

賈父來晚使我先反今見清平吏不敢飯

皇甫嵩歌

後漢書曰皇甫嵩字義真安定朝那人靈帝時黃巾作亂以嵩為左中郎

將討賊數有功拜左車騎將軍領冀州牧封  
槐里侯嵩請冀州一年田租以贍饑民百姓  
曰歌

天下大亂分市為墟母不保子分妻失夫賴得皇甫分

復安居

董逃歌

一作董帝中平中京都歌後漢書五行志曰按董謂董卓也言雖拔扈縱其殘

暴終歸逃竄至於滅族也風俗通云卓以董逃之歌主為已發大禁絕之楊孚董卓傳曰

卓改董逃

為董安

永樂世董逃遊四郭董逃蒙天恩董逃帶金紫董逃行  
謝恩董逃整車騎董逃垂欲發董逃與中辭董逃出西  
門董逃瞻宮殿董逃望京城董逃日夜絕董逃心摧傷  
董逃

布歌

華嶠後漢書曰王允與呂布及士孫瑞謀董卓有人書回字於布上負而行於市歌

曰云云有告卓者卓不悟獻帝春秋曰有書三尺布幅上作兩口相銜之字及布投卓負

布者不

復見

布乎布乎

洛陽令歌

長沙耆舊傳曰祝良字石卿為洛陽令歲時亢旱天子祈雨不得良乃暴

身階庭告誠引罪自晨至申紫

雲沓起甘雨登降人為之歌

天久不雨烝人失所天王自出祝令特苦精符感應滂

沱下雨

崔瑗歌

崔氏家傳曰崔瑗為汲令開溝造稻田蒲園之地更為沃壤民賴其利長老歌

之曰

上天降神明錫我仁慈父臨民布德澤恩惠施以序穿  
溝廣溉灌決渠作甘雨

爰珍歌

陳留者舊傳曰爰珍除六令吏人訟息教誨其子弟歌之曰

我有田疇爰父殖置我有子弟爰父教誨

高孝甫歌

陳留者舊傳曰高慎字孝甫敦質少華黑而好沈深之謀為從事號曰臥

虎故人謂之曰

巍然不語名高孝甫

襄陽太守歌

襄陽者舊傳曰襄陽太守胡烈有惠化百姓歌曰

美哉明后雋哲惟巍陶廣乾坤周孔是則文武播暢威

振遐域

兩黃歌

襄陽者舊記曰黃穆字伯開博學養門徒為山陽太守有德政致甘露白兔神

雀白鳩之瑞弟與字仲開為武陵太守貪穢無行武陵人歌曰云云言不同也

天有冬夏人有兩黃

樊惠渠歌

并序

陽陵縣東其地衍隕土氣辛螯嘉穀不植而  
涇水長流光和五年京兆尹樊君勤恤民隱  
乃立新渠築之鹵田化為甘壤農民怡悅  
相與謳謔疆畔斐然成章謂之樊惠渠云

蔡邕

我有長流莫或閼之我有溝澮莫或達之田疇斥鹵莫  
修莫釐饑饉困悴莫恤莫思乃有樊君作人父母立我  
畎畝黃潦膏凝多稼茂止惠乃無疆如何勿喜我壤既  
營我疆斯成泯泯我人既富且盈為酒為釀蒸彼祖靈  
貽福惠君壽考且寧

茅山父老歌

見雲笈七籤外編作大茅君謚茅君內傳曰茅盈成陽人也得道隱

句曲鄉人因改句曲為茅君之山時盈二弟俱賣裘為五官大夫西河太守因為執金吾各棄官渡江求兄於東山後咸得仙道太上命固治丹陽句曲山秉治常良之山盈為司命真君東嶽上卿於是盈與二弟訣別俱去固秉留治此山漢平帝元壽二年也內法既融外教坦平爾乃風雨以時五木成熟疾癘不起暴害不行父老歌曰

茅山連金陵江湖據下流三神乘白鶴各在一山頭佳  
雨灌畦稻陸田亦復周妻子保堂室使我無百憂白鶴  
翔青天何時復來遊

在一作治青天一作金穴此本倦詩舊編靈寶已謠入古此從附漢

蜀國風

華陽國志曰漢安帝時巴郡太守連失道國人風之曰按此下二篇志不云

為歌謠然亦不明云詩下

篇頗類樂府今附于後

明明上天下土是觀帝選元后求定民安孰可不念禍  
福由人願君奉詔惟德日親

蜀國刺

華陽國志曰孝桓帝時河南李盛仲和為郡守貪財重賦國人刺之曰

狗吠何諠諠有吏來在門披衣出門應府記欲得錢語  
窮及請期吏怒反見尤旋步顧家中家中無可與思往  
往鄰貸鄰人以言遺錢錢何難得令我獨憔悴



隴頭歌

秦川記曰隴西郡隴山其上懸巖吐溜於中嶺泉淖因名萬石泉泉溢漫散而

下溝澮皆注故北人升此而歌曰隴頭振漢橫吹曲有隴頭而亡其辭此或其遺也梁鼓角橫吹亦載此與匈奴歌舊編在漢今附從

隴頭流水流離四下念我行役飄然曠野登高望遠涕零雙墮

又歌

隴頭流水鳴聲幽咽遙望秦川肝腸斷絕


匈奴歌

十道志曰烏支祁連二山皆美水草匈奴失之乃作此歌

失我馬支山令我婦女無顏色失我祁連山使我六畜

不蕃息

亦載西河舊事失我祁連山二句在前



古樂苑卷四十四

欽定四庫全書

集部

古樂苑卷四十五

詳校官編修

臣

李光棟

主事銜

臣

徐以坤覆勘

總校官降調編修

臣

倉聖脉

校對官主事

臣

陳文樞

謄錄監生

臣

鄧洪繼

欽定四庫全書

古樂苑卷四十五

明 梅鼎祚 編

雜歌謠辭

漢謠

武帝太初中謠

拾遺記曰太初二年大月氏國貢雙頭雞四足一尾鳴則俱鳴

武帝置於甘泉故館更以餘雞混之得其種類而不能鳴諫者曰詩云牝雞無晨今雄雞不鳴非吉祥也帝乃送還西域行至西關雞反顧漢宮而哀鳴故謠言曰三七至王莽篡位將軍有九虎之號其後喪亂彌多宮掖中生蒿棘家無雞鳴犬吠

三七末世雞不鳴犬不吠宮中荆棘亂相繫當有九虎爭為帝

元帝時童謠

漢書五行志曰元帝時童謠至成帝建始二年三月戊子北宮中井

泉稍上溢出南流井水陰也竈烟陽也玉堂金門至尊之居象陰盛而滅陽竊有宮室之應也王莽生於元帝初元四年至成帝封侯為三公輔政因以篡位也

井水溢滅竈煙灌玉堂流金門

長安謠

漢書佞幸傳曰成帝初丞相御史條奏石顯舊惡及其黨牢梁陳順皆免官顯

與妻子徙歸故郡憂懣不食道病死諸所交結以顯為官皆廢罷少府五鹿充宗左遷立

菟太守御史中丞伊嘉  
為鴈門都尉長安謠云

伊徙鴈鹿徙菟去牢與陳實無賈

讀曰價一作石無徙

成帝時燕燕童謠

漢書五行志曰成帝時童謠後帝為微行出遊常與富平

侯張放俱稱富平侯家人過平陽主作樂見舞者趙飛燕而幸之故曰燕燕尾涎涎美好貌也張公子謂富平侯也木門倉琅根為宮門銅鑊言將尊貴也後遂為皇后弟昭儀賊害後宮皇子卒皆伏辜所謂燕飛來啄皇孫皇孫死燕啄矢者也

燕燕尾涎涎張公子時相見木門倉琅根燕飛來啄皇

孫皇孫死燕啄矢

涎徒見反

成帝時歌謠

漢書五行志曰成帝時歌謠也桂  
赤色漢家象華不實無繼嗣也王

莽自謂黃象黃

爵巢其顛也

邪徑敗良田讒口亂善人  
桂樹華不實黃爵巢其顛  
昔為人所羨今為人所憐

鴻隙陂童謠

一作王莽時汝南童謠漢書曰汝  
南舊有鴻隙大陂郡以為饒成帝

時關東數水陂溢為害翟方進為相與御史  
大夫孔光共遣掾行視以為決去陂水其地  
肥美省隄防費而無水憂遂奏罷之及翟氏  
滅鄉里歸惡言方進請陂下良田不得而奏  
罷陂云王莽時常枯旱郡中追怨  
方進時有童謠子威方進字也



壞陂誰翟子威飯我豆食羹芋魁反乎覆陂當復誰云

者兩黃鵠

一云敗我陂者翟子威  
船我大豆烹我芋魁

王莽末天水童謠

後漢書五行志曰時隗囂初起兵於天水後意稍廣欲為

天子遂被滅囂少病塞吳門  
冀郭門名也緹羣山名也

出吳門望緹羣見一塞人言欲上天今天可上地上安  
得民

王莽誅童謠

劉謙之晉紀王  
莽誅童謠云

昔年食麥屑今年食萱豆萱豆不可食使我枯隴喉

更始時南陽童謠

後漢書五行志曰更始時南陽有童謠是時更始在長安

世祖為大司馬平定河北更始大臣並僭專權故謠妖作也後更始遂為赤眉所殺是更始之不諧在赤眉也世祖自河北興

諧不諧在赤眉不得在河北

後漢時蜀中童謠

後漢書五行志曰世祖建武六年蜀中童謠是時公孫述

僭號於蜀時人竊言王莽稱黃述欲繼之故稱白五銖漢家貨明當復也述遂誅滅

黃牛白腹五銖當復

城中謠

玉臺作童謠歌漢書曰馬后履行節儉事從簡約馬廖慮以美業難終上疏長

樂官以勸成德政長安語曰  
云云斯言如戲有切事實

城中好高髻四方高一尺城中好廣眉四方且半額城

中好大袖四方全匹帛

風俗通曰趙王好大眉民間潤半額楚王好廣領國人衣沒頸

齊王好細腰後宮有餓死者

會稽童謠

後漢書曰張霸永元中為會稽太守時賊未解郡界不寧乃移書開購明

用信賞賊遂束手歸附不煩士卒之力童謠歌

弁我戟捐我矛盜賊盡吏皆休

我一作若

又謠

益部耆舊傳曰張霸為會稽太守舉賢士勸教講授一郡慕化但聞誦聲又野無遺

寇氏  
謠曰

城上烏鳴哺父母府中諸吏皆孝友

河內謠

東觀漢記曰王渙除河南溫令商賈露宿人開門卧人為作謠曰

王稚子代未有平徭役百姓喜

順帝末京都童謠

後漢書五行志曰按順帝即世孝質短祚大將軍梁冀貪

樹疏幼以為己功專國號令以瞻其私太尉李固以為清河王雅性聰明敦詩悅禮加以屬親立長則順置善則固而冀建白太后策免固徵蠡吾侯遂即至尊固是月幽斃于獄暴斃道路而太尉胡廣封安樂鄉侯司徒趙戒厨亭侯司空袁湯安國亭侯云

直如弦死道邊曲如鉤反封侯

反一作乃

桓帝初小麥童謠

後漢書五行志曰桓帝之初天下童謠按元嘉中涼州諸

羌一時俱反南入蜀漢東抄三輔延及并冀大為民害命將出衆每戰常負中國益發軍卒麥多委弃但有婦女獲刈之也吏買馬君具車者言調發重及有秋者也請為諸君鼓隴胡者不敢公言私咽語也

小麥青青大麥枯誰當穫者婦與姑丈夫何在西擊胡  
吏買馬君具車請為諸君鼓隴胡

城上烏童謠

後漢書五行志曰桓帝之初京師童謠按此皆為政貪也城上烏尾

畢通者處高利獨食不與下若謂人主多聚  
歛也公為吏子為徒者言蠻夷將畔逆父既  
為軍吏而其子又為卒徒往擊之也一徒死  
百乘車者言前一人往討胡既死矣後又遣  
百乘車往車班班入河間者言桓帝將崩乘  
與班班入河間迎靈帝也河間姪女工數錢  
以錢為室金為堂者靈帝既立其母永樂太  
后好聚金以為堂也石上慊慊春黃梁言永  
樂唯積金錢慊慊常若不足吏民春黃梁而  
食之也梁下有懸鼓我欲擊之丞卿怒者言  
永樂主教靈帝使賣官受錢所祿非其人天  
下忠薦之士怨望欲擊懸鼓以求見丞卿主  
鼓者亦復諂順  
怒而止我也

城上烏尾畢逋公為吏子為徒一徒死百乘車車班班

入河間河間姁女工數錢以錢為室金為堂石上慊慊  
春黃糧梁下有懸鼓我欲擊之丞卿怒

桓帝初京都童謠

五行志曰延熹末鄧皇后以  
譴自殺乃以竇貴人代之其

父名武字游平拜城門校尉及太后攝政為  
大將軍與太傅陳蕃合心戮力惟德是建印  
綬所加咸得其人蒙  
賢大姓皆絕望矣

游平賣印自有平不辟豪賢及大姓

鄉人謠

初桓帝為侯時受學於甘陵周福及後  
即位擢為尚書時同郡房植有名謠云

天下規矩房伯武因師獲印周仲進

伯武植字  
仲進福字

任安二謠

後漢書曰任安字定祖廣漢綿竹人少遊太學受孟氏易兼通數經又從

同郡楊厚學圖讖窮極其術時人稱曰

欲知仲桓問任安

又

居今行古任定祖

二郡謠

後漢書曰汝南太守宗資任功曹范滂南陽太守成瑨亦委功曹岑暉范滂字

孟博岑暉字公

孝二郡為謠

汝南太守范孟博南陽宗資主畫諾南陽太守岑公孝



弘農成瑨但坐嘯

太學中謠

見陶淵明集袁山松後漢書曰桓帝時朝廷日亂李膺風格秀整高自標

尚後進之士升其堂者以為登龍門太學生三萬餘人勝天下士上稱三君次八俊次八

顧次八及次八厨猶古之八元八凱也因為七言謠曰

天下忠誠竇游平

大將軍槐里侯扶風平陵竇武字游平

天下義府陳仲

舉

太傅高陽鄉侯汝南平興陳蕃字仲舉

天下德弘劉仲承

侍中河間樂成劉淑字仲

承

右三君

一云不畏強禦陳仲舉九卿直言有陳蕃

天下模楷李元禮

少傅潁川襄城李膺字元禮

天下英秀王叔茂

司空

山陽高平王暢字叔茂

天下良輔杜周甫

太僕潁川陽城杜密字周甫

天下冰

凌朱季陵

司隸校尉沛國朱寓字季陵

天下忠貞魏少英

尚書會稽上虞魏朗

字少英

天下好交荀伯條

沛國潁陰荀昱字伯條

天下稽古劉伯祖

太尉農博陵安平劉祐字伯祖

天下才英趙仲經

太常蜀郡成都趙典字仲經

右八俊

天下和雍郭林宗

有道太原介休郭泰字林宗

天下慕恃夏子治

太常

陳留國夏馥字子治

天下英藩尹伯元

尚書令河南鞏尹勲字伯元

天下清苦

羊嗣祖

河南尹太山平陽羊陟字嗣祖

天下珪金劉叔林

議郎東郡發劉儒字叔林

天下雅志蔡孟喜

冀州刺史陳國項蔡衍字孟喜

天下卧虎巴恭祖

川

太守渤海東城巴肅字恭祖

天下通儒宗孝初

議郎南陽安衆宗慈字孝初

右八顧

後漢書無劉儒有范滂

海內賢珍陳子鱗

御史中丞汝南召陵陳翔字子鱗

海內忠烈張元節

太尉山陽高平張儉字元節

海內謇諤范孟博

太尉掾汝南細陽范滂字孟博

海內

通士檀文友

蒙令山陽高平檀敷字文友

海內才珍孔世元

洛陽令魯國孔

昱字世元後漢書云字元世

海內彬彬范仲真

太山太守渤海重合范康字仲真

海

內珍好岑公孝

太尉掾南陽棘陽岑晷字公孝

海內所稱劉景升

鎮南將軍

荊州牧武城侯山陽高平劉表字景升

右八及

少府書無范滂有崔起

海內賢智王伯義

少府東萊曲城王商字伯義後漢書作王章

海內修整蕃

嘉景

郎中魯國蕃嚮字嘉景

海內貞良秦平王

北海相陳留己吾秦周字平王

海

內珍奇胡母季皮

待御史太山奉高胡母班字季皮

海內光光劉子相

太尉掾潁川陰劉翊字子相

海內依怙王文祖

冀州刺史東平壽張王考字文祖

海

內嚴恪張孟卓

陳留相東平壽張張邈字孟卓

海內清明度博平

荊州刺史

山陽湖陸度

尚字博平

右八廚

後漢書無劉翊有劉儒

桓帝末京都童謠

後漢書五行志曰桓帝之末京都童謠按解犢亭屬饒陽

河間縣也居無幾何而桓帝崩使者與解犢侯皆白蓋車從河間來延延衆貌是時御史劉儵建議立靈帝以儵為侍中中常侍侯覽畏其親近必當問已白拜儵泰山太守因令司隸迫促殺之朝廷少長思其功効乃拔用其弟郃致位司徒此為合諧也

白蓋小車何延延河間來合諧河間來合諧

桓帝末京都童謠

後漢書五行志曰按易曰拔茅連茹以其類征吉茅喻羣

賢也井者法也于時中常侍管霸蘇康憎疾  
海內英哲與長樂少府劉器太常許永尚書  
柳分尋穆史佟司隸唐珍等代作唇齒河內  
牢川詣闕上書汝潁南陽上采虛譽專作威  
福甘陵有南北二部三輔尤甚由是博考黃  
門北寺始見廢閣茅田一頃者言羣賢多也  
中有井者言雖阨窮不失其法度也四方織  
織不可整者言姦慝大熾不可整理嚼復嚼  
者京都飲酒相強之辭也言食肉者鄙不恤  
王政徒耽宴飲歌呼而已也今年尚可者言  
但禁銅也後年饒者  
陳寶被誅天下大壞

茅田一頃中有井四方織織不可整嚼復嚼今年尚可

後年饒

風俗通  
作饒

桓靈時童謠

後漢書曰桓帝之世更相謔舉人為之謠

舉秀才不知書察孝廉父別居

又

見抱朴子

舉秀才不知書舉孝廉父別居寒素清白濁如泥高第

良將怯如鼫

譚苑醍醐云泥音涅鼫音蔑鼫或音密則泥當音匿古音例無定也晉書作怯如雞

蓋不得其音而改之

靈帝末京都童謠

後漢書五行志曰靈帝之末京都童謠至中平六年少帝

登躡至尊獻帝未有爵號為中常侍段珪等所執公卿百官皆隨其後到河上乃得來還

此為非侯非王  
上北芒者也

侯非侯王非王千乘萬騎上北芒

張璠漢記  
走北邙

羊續謠

古今善言曰續字興祖太山人靈帝時  
欲用為三司而中官求其賂續出黃紙

補袍以示使  
者時人謠曰

天下清苦羊興祖

八顧中有云天下清  
苦羊嗣祖乃羊陟也

京兆謠

續漢書曰李燮拜京兆詔發西園錢燮  
上封事遂止不發吏民愛敬乃為此謠

我府君道教舉恩如春威如虎剛不吐柔不如愛如母

訓如父



獻帝初童謠

後漢書五行志曰獻帝初童謠公孫瓚以為易地當之遂徙鎮焉乃

修城積穀以待天下之變建安三年袁紹攻瓚瓚大敗繼其姊妹妻子引火自焚紹兵趣登臺斬之初瓚破黃巾殺劉虞乘勝南下侵據齊地雄威大震而不能開廓遠圖欲以堅城觀時坐聽國戮斯亦自易地而去世也

燕南垂趙北際中央不合大如礪唯有此中可避世

獻帝初京都童謠

後漢書五行志曰獻帝元初京都童謠按千里草為董十

日卜為卓凡別字之體皆從上起左右離合無有從下發端者也今二字如此者天意若曰卓自下摩上以臣陵君也青青暴威之貌不得生者亦旋破亡

千里草何青青十日卜不得生

英雄記作  
猶不生

興平中吳中童謠

吳志曰初興平中吳中童謠  
閭門共西郭門後孫權即位

吳 稱

黃金車班蘭耳開閭門出天子

閭一作閭

建安初荊州童謠

後漢書五行志曰言自中興  
以來荊州無破亂及劉表為

牧又豐樂至此逮八九年當始衰者謂劉表  
妻當死諸將並零落也十三年無子遺者言

十三年表又當死  
民當移詣冀州也

八九年間始欲衰至十三年無子遺

恒農童謠

陳留耆舊傳曰吳祐為恒農令勸善懲姦貪濁出境甘露降年穀豐童謠

曰

君不我憂人何以休不行界署焉知人處

閻君謠

華陽國志曰閻慮字孟度為綿竹令以禮讓為本童謠曰

閻君賦政既明且昶去苛去辟動以禮讓

一云閻君賦政明且咏

苛去辟以禮讓

京師謠

後漢黃琬傳曰舊制光祿三四省郎以高功九次才德尤異者為茂才異行時

權富子弟以人事得舉而貧約守志者以窮迫見遺京師為之謠曰

欲得不能光祿茂才

能乃來切

少林

益都者舊傳曰王忱字少林詣京師於客邸見諸生病甚困生謂忱曰腰下有金十

觔願以相與乞收藏尸骸未問姓名呼吸因絕忱賣金一片以給棺絮九斤置生腰下後署大度亭長到亭日有馬一匹至亭中其日大風有一繡被隨風來後忱騎馬突入它舍主人見曰得真盜矣忱說得狀又取被視之彦父悵然曰被馬俱止卿有何陰德忱具說葬諸生事彦父曰此吾子也姓金名彦遣迎彦喪餘金具存民謠之曰

信哉少林世為遇飛被走馬與鬼遇

石里

商氏世傳曰商亮字子華舉孝廉到陽城遇兩虎爭一羊亮按劍直前斬羊虎乃各

以其一半去時  
人為之謠曰

石里之勇商子華暴虎見之藏爪牙

藏一作合

漢末謠

地理志曰武康縣本烏程之餘不鄉也  
漢末童謠云云吳乃改會稽之餘暨為

永興分餘不為  
永安以協謠言

天子當興東南三餘之間

古樂苑卷四十五

欽定四庫全書

古樂苑卷四十六

明 梅鼎祚 編

雜歌謠辭

漢語

楚人諺

漢書云季布為任俠有名楚人諺曰

得黃金百不如得季布諾

韓信引人言

史記曰漢六年人有上書告楚王信反高祖令武士縛信信曰果若

人言

狡兔死良狗烹高鳥盡良弓藏敵國破謀臣亡

良書作走高作

飛

淮陽語

河南志應曜隱於淮陽山中與四皓俱微獨不至時人語曰

商山四皓不如淮陽一老

鄙語

史記世家曰顏常以前陳平為高帝謀執樊噲數讒曰陳平為相非治事日飲醇酒

戲婦女呂太后聞之私獨喜面質呂顏於陳平曰鄙語曰云云顧我於君何如耳無畏呂

顏之  
讒可

兒婦人口不可用



賈誼疏引諺

誼上疏曰夫三代之所以長久者以其輔翼太子有此具也及秦而

不然彼其所以道之者非其理故也鄙諺曰云云又曰云云

不習為吏視已成事

大戴禮不習為吏如視已成事

前車覆後車誡

里諺

賈誼疏曰里諺曰云云此善諭也鼠近於器尚憚不投況於貴臣之近主乎故有賜

死而亡戮辱又云臣聞之履雖鮮不以加枕冠雖敝不以苴履

欲投鼠而忌器

袁盎引語

史記曰文帝從霸陵上欲西馳下峻阪袁盎騎並車擊轡上曰將軍怯邪

益曰臣聞云  
云亦不云語

千金之子坐不垂堂百金之子不騎衡

服虔曰指身不倚衡也如淳曰

衡樓殿邊欄楯也

晁錯傳引語

史記太史公曰晁錯為家令時數言事不用後擅權多所變更反以

亡軀語曰云云  
晁錯等謂邪

變古亂常不死則亡

韓安國引語

史記曰公孫詭羊勝說孝王求為帝太子及益地事景帝乃遣使捕

詭勝至梁安國入見王而泣曰治天下終不以私亂公語曰云云今大王悅一邪臣浮說

犯上禁撓明法有如太后宮車即  
晏駕大王尚誰攀乎詭勝自殺

雖有親父安知其不為虎雖有親兄安知其不為狼漢書

並無其字

按安國傳安國與王恢論伐匈奴以為勿

擊便曰強弩之極矢不能穿魯縞銜風之末力不能漂

鴻毛不云何語惟漢書臣聞之銜風之末力不能

入魯縞亦不云語也且此傳中臣聞之類頗多

語

漢書漢廷臣方議削吳吳王恐削地無已因  
發謀舉事聞膠西王勇好兵諸侯皆畏憚之

於是迺使中大夫應高口說膠西王曰今者

主上任用邪臣聽信讒賊變更律令侵削諸

侯徵求滋多誅罰良重日以益甚語有之曰

云云吳與膠西知名諸侯也一時見察不得

安肆矣大王誠幸而許之一言則天

下可并兩主分割不亦可乎王曰善

牯糠及米

牯古  
純字

諺

外戚世家漢武帝夫人尹婕妤見邢夫人  
低頭俛而泣自痛其不如也諺曰云云

美女入室惡女之仇

引傳

三王世家引傳曰  
魯子書作諺曰

蓬生麻中不扶自直白沙在泥與之皆黑

李廣傳引諺

史記太史公曰余睹李將軍悛悛  
如鄙人口不能道辭及死之日天

下知與不知皆為盡哀彼其忠  
實心誠信於士大夫也諺曰

桃李不言下自成蹊

諫獵疏引諺

司馬相如傳曰常從上至長楊獵是時天子方好自擊熊羆馳逐野

獸相如上疏諫引鄙諺曰云云此言雖小可以喻大

家系千金坐不垂堂

郭解傳引諺

史記太史公曰吾觀郭解狀貌不及中人言語不足采者然天下無

賢與不肖知與不知皆慕其聲言俠者皆引以為名諺曰云云

人貌榮名豈有既乎

徐廣曰人以顏狀為貌者則貌有衰落矣唯用榮名為飭表則稱譽

無極也

司馬遷引語

漢書曰遷既被刑之後為中書令任安與遷書責以古賢臣之義遷

報書曰顧自以為身殘處穢動而見尤  
欲益反損是以抑鬱而無誰語語曰

誰為為之孰令聽之

紫宮諺

漢書曰李延年善歌能為新聲  
與女弟俱幸武帝時人語曰

一雌復一雄雙飛入紫宮

逐彈丸

西京雜記曰韓嫣好彈以金為丸一日  
所失者十餘長安為之語曰逐彈京師  
兒童每聞嫣出彈輒隨  
之望丸所落便拾取焉

苦飢寒逐彈丸

馬肝石語

郭憲別國洞冥記曰元鼎五年邳支  
國貢馬肝石百斤常以水銀養之內

玉櫃中金泥封其上國人長四尺惟餌此石而已半青半白如今之馬肝春碎以和九轉之丹服之彌年不飢渴也以之拂髮白者皆黑帝坐羣臣於甘泉殿有髮白者以石拂之應手皆黑是時公卿語曰

### 不用作方伯惟須馬肝石

#### 黃地珠語

別國洞冥記曰有鳳葵草色丹葉長四寸味甘久食令人身輕肌膚滑赤松

子餌之三歲乘黃地入水得黃珠一枝色如真金或言是黃地之卵故名地珠亦名銷疾珠語曰

### 寧失千里駒不失黃地珠

聲風木語

別國洞冥記曰太初二年東方朔從西那汗國歸得聲風木十枝獻帝長

九尺大如指此木臨因桓之水則禹貢所謂因桓是也其源出甜波樹上有紫燕黃鵲集其間實如油麻風吹枝如玉聲因以為名帝以枝通賜尊臣臣有凶者枝則汗臣有死者枝則折昔老聃在於周世年七百歲枝竟未汗倭佺生於堯時年三千歲枝竟未一折帝乃以枝問朔朔曰臣已見此枝三過枯死而復生豈汗折而已哉里語曰

年未半枝不汗

此木五十年一濕萬歲不枯

龍爪薤語

別國洞冥記曰烏夷國有龍爪薤長九尺色如玉煎之有膏以和紫桂為

丸服一粒千歲不飢故語曰



薤和膏身生毛

龜黃語

別國洞冥記曰影娥池中有龜龜望其羣出岸上如連壁弄於沙岸也故語曰

夜未央待龜黃

路溫舒引諺

漢書初孝武之世張湯趙禹條定法令禁網寢密宣帝時廷尉史路

溫舒上書  
引諺曰

畫地為獄議不入刻木為吏期不對

東家棗

漢書曰王吉少時居長安其東家有棗樹垂吉庭中吉婦取以啖吉吉知而去

婦東家聞欲伐其樹鄰里止之因請吉還婦為之語曰東家吉字子陽琅邪阜虞人昭帝

時為博士

諫大夫

東家棗樹王陽婦去東家棗完去婦復還

鄒魯諺

漢書曰韋賢少子立成復以明經歷位至丞相故鄒魯諺曰

遺子黃金滿籬不如一經

諸葛豐

漢書曰諸葛豐元帝擢為司隸校尉刺舉無所避京師語曰

間何濶逢諸葛

言問者何久濶不相見以逢諸葛故也

三王

漢書曰成帝時王吉子駿為京兆尹試以政事先是京兆有趙廣漢張敞王尊王章

王駿皆有能名故京師稱曰

前有趙張後有三王

五鹿

漢書曰少府五鹿充宗貴幸為梁丘易元帝好之欲考其異同今與諸易家論充宗

辨口諸儒莫能抗有薦朱雲者召入擲齊登堂抗首而請既論難連折五鹿君故諸儒為

之語曰

五鹿嶽嶽朱雲折其角

谷樓

漢書曰樓護字君卿精辯論議常依名節聽之者皆竦與谷永俱為五侯上客長安

號曰谷樓言其見信用也

谷子雲之筆札樓君卿之喉舌

張文

漢書曰成帝為太子及即位以張禹論語為師以上難數對以問經為論語章句獻

之諸儒為之語曰張文由是學者多從張氏餘家寢微

不欲為論念張文

里語

漢書成帝欲立趙婕妤為皇后諫大夫劉輔上書引里語曰云云書奏上使侍御史

牧縛輔繫獄

腐木不可以為柱卑人不可以為主

里諺

漢書成帝益封董賢二千戶賜三侯國王嘉上封事諫曰往古以來貴臣未嘗有此

流聞四方皆同怨之里諺曰云云

千人所指無病而死

蕭朱

漢書曰蕭育少與陳咸朱博為友著聞當世住者有王貢故長安人語曰云云言其

相薦達也始育以公卿子顯名咸最先進為御史中丞時朱博尚為陵亭長為咸育所舉拔而博先至將軍上卿歷位多於咸育遂至丞相育與博後有隙不能終故世以友為難也王貢謂王陽貢禹

蕭朱結綬王貢彈冠

王陽語

應劭風俗通曰漢書說王陽雖儒生自寒賤然好車馬衣服極為鮮好及遷徙

去處所載不過糞衣去位家居亦布衣蔬食天下服其廉而怪其奢故俗傳王陽為能作

黃金語曰云云王陽居官食祿雖為鮮明車馬衣服亦能幾所何足怪之乃傳俗說班固之論陋於足矣

金不可作世不可度

一云金可作世可度

杜陵蔣翁

稽康高士傳云蔣詡字元卿杜陵人為宛州刺史王莽為宰衡詡奏事到

溺上稱病不進歸杜陵荆棘塞門舍中三逕終身不出時人諺曰

楚國二龔不如杜陵蔣翁

王君公

後漢書曰逢萌與同郡徐房平原李子雲王君公相友善並曉達陰陽懷德穢

行房與子雲養徒各千人君公遭亂獨不去儉牛自隱時人語曰

避世牆東王君公

語林亦載

幘如屋

蔡邕獨斷曰古幘無巾王莽頭禿乃始施巾故語曰

莽頭禿幘如屋

應劭漢官儀亦載里語曰王莽頭禿施幘屋

投閣

漢書曰王莽篡位後復上符命者莽盡誅之時楊雄校書天祿閣使者欲收雄雄恐

乃從閣自投幾死京師為之語曰

惟寂惟莫自投于閣爰清爰靜無作符命

南陽舊語

三輔決錄曰南陽舊語云云言其節儉也

前隊大夫范仲公鹽豉蒜果共一簋

公一作翁王莽時官有前隊之名

竈下養

陳觀漢記曰更始所授官爵皆羣小賈豎或有膳夫庖人長安中為之語曰

竈下養中郎將爛羊胃騎都尉爛羊頭關內侯

郭氏語

拾遺記曰郭況者光武皇后弟也累金數億錯拾寶以飾臺榭懸明珠於四垂

晝視之如星夜望之如日里語曰

洛陽多錢郭氏室夜日晝星富無匹

嘖

後漢書曰光武姊湖陽公主新寡帝與共論朝臣微觀其意主曰宋公威容德器羣臣莫

及帝曰方且國之後宋弘被引見帝令主坐屏風後因謂弘曰諺言云云人情乎弘曰臣聞貧賤之交不可忘糟糠之妻不下堂帝顧主曰事不諧矣



貴易交富易妻

南陽諺

後漢書曰南陽太守杜詩政治清平百姓便之時人以方召信臣南陽為之語

曰

前有召父後有杜母

戴侍中

謝承後漢書云戴憑徵博士詔公卿大會令與諸儒難說帝善之後正旦朝賀

羣臣說經更相難詰義有不通輒奪其席以益通者憑遂重坐五十餘席故京師語曰

解經不窮戴侍中

一曰說不窮戴侍中

井大春

嵇康傳曰井丹字大春扶風郿人博學高論京師為之語曰

五經紛綸井大春

馮仲文

東觀漢記曰豹字仲文好儒學以詩傳教授鄉里為之語三輔決錄口馮豹字

仲文後母遇之甚酷豹事之愈謹時人為之語

道德斌斌馮仲文

賈長頭

東觀漢記曰賈逵字景伯能講左氏及五經本文以夏侯尚書教授諸儒為之

語曰

問事不休賈長頭

後漢書逵身長八尺二寸

諺

漢書曹棨拜博士上疏具陳禮樂班固謂宜廣集諸儒共議得失帝曰諺言云云

作舍道傍三年不成

符子戴左丘明曰古諺有之築室

俗語

東觀漢記明德馬太后時上欲封諸舅外間白太后曰吾自念親屬皆無柱石之功

俗語

時無赭澆黃土

邵伯春

東觀漢記曰邵訓字伯春鄉里號之曰

德行恂恂邵伯春

江夏黃童

後漢書曰黃香字文彊江夏人博學經典究精道術京師號曰

天下無雙江夏黃童

虞詡引諺

漢書曰永初四年羌胡反亂殘破并涼大將軍鄧騭欲棄涼州詡說太尉

李脩以為不

可引諺云

關東出相關西出將

前書云秦漢以來山東出相山西出將

陳忠疏稱語

東觀漢記曰陳忠上疏稱語曰

迎新千里送故不出門

楊伯起

東觀漢記曰楊震少嘗受歐陽尚書於太常桓郁經明博覽無不窮究諸儒為

之語曰

關西孔子楊伯起

震字伯起

諺

陸方賢楚國先賢傳見太平御覽

黃尚為司隸奸慝自弭左雄為尚書令天下慎選舉

邊延

後漢書曰延篤字叔固及邊鳳皆為京兆尹並有能名語曰張趙即趙廣漢及張敞

也

前有張趙後有邊延

李固引語

後漢書黃瓊傳公車徵瓊至綸氏稱疾不進先是徵聘處士多不稱望李

固以書逆遣之曰嘗聞語曰云云

曉曉者易缺皦皦者易汚陽春之曲和者必寡盛名之

下其實難副

胡伯始

後漢書曰太傅胡廣周流四方三十餘年歷仕六帝禮任極優練達故事明解

朝章雖無審審直言之風屢有補闕之益故京師諺曰

萬事不理問伯始天下中庸有胡公

廣字伯始

周宣光

東觀漢記曰周舉字宣光姿貌短陋而博學洽聞為儒者所宗京師語曰

五經縱橫周宣光

京師語

袁山松後漢書桓帝時京師稱曰

李元禮巖巖如玉山陳仲舉軒軒如千里驥

南陽語

袁山松後漢書曰桓帝時南陽語曰

朱公叔肅肅如松栢下風

四侯

後漢書曰單超王綰徐璜具瑗唐衡桓帝時共誅梁冀同日封侯謂之五侯於是朝

廷日亂超薨之後其四侯轉橫天下為之語曰

左迴天具獨坐徐卧虎唐雨墮

一作雨墮又作應聲

考城諺

後漢書曰仇覽字季智一名香陳留考城人為蒲亭長初到亭有陳元之母詣

覽告元不孝覽以善言勸慰之母聞感悔涕

泣而去覽乃親到元家與其母子飲因為陳

人倫孝行譬以禍福元卒

成孝子鄉邑為之諺曰

父母何在在我庭化我鵲巢所生

孤犢諺

謝承後漢書曰仇覽字季智一名香陳留考城人也為縣陽遂亭長有羊元者

山惡不孝其母詣覽告之覽呼元責謂元以子道與孝經一卷使誦讀之元深改悔至母前謝罪曰諺曰云云乞今自改卒成佳士

孤犢觸乳驕子罵母

罵一作署

赦諺

崔寔政論曰孝文皇帝即位二十三年乃赦示不廢舊章而已近永平建初之際亦

六七年乃赦亡命之子皆老於草野窮困惡艾頃間以來歲旦赦百姓輕為姦非前年一暮之中大小四赦諺曰云云況不執之民孰不肆意遂以赦為常俗赦以趣赦轉相駢欺



而不得息雖日  
救之亂彌繁也

一歲再赦奴兒啞啞

崔寔引里語

政論曰每詔書所欲禁絕雖重愆  
惻罵詈極筆猶復廢捨終無悛意

故里  
語曰

州郡記如霹靂得詔書但掛壁

朱伯厚

後漢書曰朱震字伯厚為州從事奏濟陰太守賊罪之數諺曰

車如雞棲馬如狗疾惡如風朱伯厚

太常妻

應劭漢官儀北海周澤為太常恒齋其妻憐其年老痼病窺內問之澤大怒以

為千齋掾吏扣頭爭之不聽遂收送詔獄并自劾論者非其激發彥曰

居世不諧為太常妻一歲三百六十日三百五十九日

齋一日不齋醉如泥既作事復低迷

居世一作生代後漢書無后二句

縫掖

續漢書曰皇甫規安定鄉人有以貨買鴈門太守者亦還家書刺謁規規卧不迎有

項曰王符在門規驚遽而起屣履出迎時人為之語曰

徒見二千石不如一縫掖

荀氏八龍

續漢書曰荀爽字慈明幼而好學就思經書慶弔不行微命不應潁川為

之語曰

荀氏八龍慈明無雙

公沙六龍

袁山松後漢書曰公沙穆有六子時人號曰

公沙六龍天下無雙

賈偉節

三輔決錄曰賈彪兄弟三人並有高名彪最優故天下稱曰

賈氏三虎偉節最怒

雷陳

後漢書曰雷義字仲公豫章鄱陽人舉茂才讓于陳重刺史不聽義遂佯狂走不應

命鄉里為

之語曰

膠漆自謂堅不如雷與陳

作奏

邯鄲氏笑林曰桓帝時有人辟公府掾者倩人作奏記文人不能為作因語曰梁國

葛龔者先善為記文自可為用不煩更作遂從人言寫記文不去龔名姓府公大驚不答而罷歸時人語曰按後漢書葛龔和帝時以文記知名

作奏雖工宜去葛龔

避驄

後漢書曰桓典字公雅靈帝時為侍御史是時宦官秉政典執正無所迴避常乘驄

馬京師畏憚為之語曰

行行且止避驄馬御史

李德公語

華陽國志曰李固為太尉質帝崩梁冀召議所立僉舉清河王蒜冀然之

奏御太后中常侍曹騰私恨祿說冀明日更  
議因與杜喬必爭祿宜立冀不聽策免固喬  
歲餘徵下獄自裁子雙字德公拜東平相國  
王為黃巾所沒得出天子復封之雙以為不  
可果敗時人  
為之語曰

### 李德公父不欲立帝子不欲立王

郭君

江表傳曰郭典字君業為鉅鹿太守與中  
郎將董卓攻黃巾賊張寶於曲陽典作圍

塹卓不肯與獨於西當賊之衝晝夜進  
攻寶由是城守不敢出時人為之語曰

郭君圍塹董將不許幾令狐狸化為豺虎賴我郭君不  
畏強禦轉機之間敵為窮虜猗猗惠君寶完疆土

袁文開

英雄記曰袁紹父成字文開貴戚自梁冀以下皆與交言無不從京師諺曰

事不諧詣文開

詣一作問

飢人語

袁紹在冀州時滿市黃金而無斗粟餓死者相食人為之語

虎豹之口不如飢人

時人語

曹操別傳曰呂布驍勇且有駿馬名赤兔常騎乘之時人為之語曰

人中有呂布馬中有赤兔

里語

風俗通曰頃者廷尉多牆面苟充茲位持書侍御史不復平議獻當糾紛豈一哉里

語曰

縣官漫漫冤死者半

狐渡語

風俗通曰九江多虎百姓苦之前將募民捕取武吏以除賦課郡境界皆設陷

穿後太守宋均到官乃移記屬縣璩檻穿勿復課錄退奸殘進忠良從虎悉東渡江俚語云云舟人揖擢猶尚畏怖不敢迎上與之周旋云悉東渡誰指見者

狐欲渡河無奈尾何

俚語

風俗通曰山陽太守汝南薛恭祖喪其妻不哭謹按禮為嫡妻杖重於宗也終始永

絕而烏無惻容俚語云云豈不悖哉

婦死腹悲唯身知之

陳茂語

風俗通曰汝南陳茂君因為荊州刺史時南陽太守灌恂本召清能茂不入

城引車到城東為友人衛修母拜到州恂先是茂客仕蒼梧還到修家說修坐事繫獄當死因詣府門移辭乞恩隨輩露首入坊中太守大驚立賜巾延請即為出修南陽士大夫謂恂能救解修茂彈繩不撓修竟極罪恂亦以它事去南陽疾惡殺修為之語曰

衛修有事陳茂治之衛修無事陳茂殺之

龐儉

風俗通曰龐儉父先逃走隨母流宕後居鄉里鑿井得銅遂溫富買奴曰堂上者我

婦也問其故奴曰我婦姓父字阿宏足下有黑子腋下赤志母曰我翁也遂為夫婦時

人曰



鑿井得銅買奴得翁

劉太常

華嶠後漢書曰劉愔為太常論議常引正大義諸儒為之語曰

難經伉伉劉太常

楊子行

東觀漢記曰楊政字子行治梁丘易與祁聖元同好俱名善說京師號曰

說經鏗鏘楊子行論難僭僭祁聖元

續漢書無下句

許叔重

後漢書曰許慎字叔重少博學經籍馬融常推敬之時人為之語續漢書慎以

五經傳說臧否不同撰五經異義傳于世

五經無雙許叔重

陳君期

東觀漢記曰陳器字君期善說詩語曰

關東說詩陳君期

魯叔陵

東觀漢記曰魯平字叔陵兼通五經拜趙相雖居官不廢教授關東號曰

五經復興魯叔陵

繆文雅

皇甫謐達士傳曰繆斐字文雅代修儒學經術修明學士稱之時人為之語曰

素車白馬繆文雅

許倬君

陳留風俗傳曰許晏字倬君授魯詩於鄉鄰王改學曰許氏章句列在儒林故

曰諱

殿上成羣許偉君

柳伯騫

江表傳曰柳琮字伯騫所拔進皆為時所稱致位牧守鄉里為諺曰

得黃金一筭不如為柳伯騫所識

白眉

襄陽耆舊傳曰蜀馬良字季常宜城人也兄弟五人並有才名鄉里為之諺良眉中

有白毛故以稱之

馬氏五常白眉最良

荆州先賢傳作頌

五門

三輔決錄曰五門子孫凡民之五門今在河南西四十里澗穀洛三水之交傳聞馬

氏兄弟五人共居此地作五門客舍因以為名主養豬賣豚故民為之語曰

苑中三公館下二卿五門嚙嚙但聞豚聲

魯國孔氏

孔叢子曰子和二子長曰長彥次曰季彥甘貧味道研精墳典十餘年間

會徒數百故時人為之語曰

魯國孔氏好讀經兄弟講誦皆可聽學士來者有聲名

不過孔氏那得成

相里諺

文士傳云留侯七世孫張讚字子卿初居吳縣相人里時人諺曰

相里張多賢良積善應子孫昌

時人詩

華陽國志曰趙社遣吏先尼和拜檄巴蜀守過成瑞灘死子賢求喪不得女終

年二十五過分金珠作二錦囊繫兒下至二年二月十五日女終乃乘小船至父沒所哀哭自沈見夢告賢曰至二十一日與父尸俱出至日父子浮出縣言郡太守蕭登高之尚書遣戶曹掾為之立碑黃帛楚道人張真妻也貞受易於韓子方去家三十里船覆死貞弟求喪經月不得帛乃自往沒處躬訪不得遂自投水中大小驚睨積十四日持夫手浮出時人為語曰先尼和符人黃一作張

符有先絡楚道黃帛求其夫天下無有其偶

折氏諺

華陽國志曰折象字伯武雒人也其先張江為武威太守封南陽折侯因氏焉

事東平虞叔雅以道教授門人朋友自遠而至時人為諺曰

折氏客誰朱雲卿段節英中有佃子趙仲平但說天文

論五經

四珍語

華陽國志曰秦瑛南鄭楊拒妻大鴻臚劉巨公女也有四男二女拒亡教訓六

子動有法矩四男才官隆於先人故時人為語曰

三苗

闕

止四珍復起

游幼齊

三輔決錄曰游殷字幼齊為胡軫所害歲餘軫得病但言伏伏游幼齊將鬼來

於是遂死

闕中訪曰

生有知人之明死有責人之靈

封使君

述異記曰漢宣城守封劭化為虎食郡民民呼曰封使君因去不復來時人語

曰

無作封使君生不治民死食民

邴君

邴原別傳曰原避地遼東以虎為患自原之落獨無虎患嘗行而得遺錢拾以繫樹

枝此錢不見取繫錢者適多原問其故答者謂之社樹原惡其由已而成妄祀乃辨之於是里中遂斂其錢以為社供里長老為之誦曰

邴君行仁落邑無虎邴君行廉路樹成社

貨殖傳引諺

富者得勢益彰失勢則客無所之以而不樂諺曰云云此非空言也

千金之子不死於市

尉繚子千金不死百金不刑

百里不販樵千里不販糴

以貧求富農不如工工不如商刺繡文不如倚市門

藝文志引諺

經方論曰以熱益熱以寒益寒是所獨失也故諺曰

有病不治常得中醫

治平

穀語

風俗通曰穀有二陵在弘農澠池縣其語曰

東穀西穀澠池所高


洛陽語

陸機洛陽記曰洛陽有銅駝街漢銘銅駝二枚在宮南西會道相對俗語曰



金馬門外集衆賢銅駝陌上集少年

此或晉時語



古樂苑卷四十六

欽定四庫全書

集部

古樂苑卷四十七

詳校官編修<sub>臣</sub>李充棟

主事銜<sub>臣</sub>徐以坤覆勘

總校官降調編修<sub>臣</sub>倉聖脉

校對官主事<sub>臣</sub>陳文樞

謄錄監生<sub>臣</sub>鄧洪繼

欽定四庫全書

古樂苑卷四十七

明梅鼎祚編

禱歌謠辭

三國

蜀漢

諺

孔明諺

襄陽耆舊傳曰黃彥承高爽開朗為汚南名士謂孔明曰聞君擇婦身有醜女

黃頭黑面才堪相配孔明許

即載送之鄉里為之諺曰

莫學孔明擇婦正得阿承醜女

李鱗甲

江表傳曰諸葛亮表都尉李嚴少為郡吏用性深尅苟利其身鄉里為嚴諺曰

難可狎李鱗甲

諸葛諺

晉漢春秋曰諸葛亮卒楊儀整軍而出宣王不逼百姓諺曰

死諸葛走生仲達

何隨語

華陽國志曰何隨字季業蜀郡郫人也除安漢令蜀亡去官時巴土饑荒所在

無穀送吏行乏輒取道側民芋隨以綿繫其處使足所取直民視芋見綿在語曰聞何安漢清廉行過從者無糧必能爾耳持綿追還之終不受因為語曰

安漢吏取糧令為之償

蜀語

華陽國志曰巴西郡二主之世稱美荆楚先漢以來馮車騎范鎮南皆植斯鄉故曰

巴有將蜀有相

假鬼教

華陽國志曰先主薨後雍閬殺益州太守正昂更以蜀郡張裔為太守閬假鬼

教曰云云按蜀書云張府君如瓠壺外雖澤而內實粗不足殺今送與吳似不當附語

張裔府君如瓠壺殺之不可送與吳

魏

歌

徐州歌

晉書曰王祥隱居廬江三十餘年不應州郡之命徐州刺史呂虔檄為別駕于

時寇盜充斥祥率勵兵士頻討破之州界清靜政化大行時人歌之按魏志呂虔文帝

時遷徐州刺史請  
琅邪王祥為別駕

海沂之康實賴王祥邦國不空別駕之功

滎陽令歌

殷氏世傳曰殷襲為滎陽令廣樂學館會集朋徒民知禮讓乃歌之云

滎陽令有異政修立學校人易性令我子弟耻鬪訟府

作訟

行者歌

選詩拾遺作魏時童謠歌云見五行志王子年拾遺記曰文帝所愛美人薛靈

芸常山人也年十五容貌絕世咸熙中文帝選良家子女以入六宮常山太守習谷以千金寶賂聘之以獻至京師帝以文車十乘迎之道側燒石葉之香未至數十里膏燭之光

相續不滅車徒咽路塵起蔽於星月又築土  
為臺基高三十丈列燭於臺下遠望如列星  
之墜地又於大道之傍一里一銅  
表高五尺以誌里數故行者歌曰

青槐夾道多塵埃龍樓鳳闕望崔嵬清風細雨襍香來

土上出金火照臺

此七字是妖辭也銅表誌道是土上  
出金之義以燭置臺下則火在土下

之義漢火德王魏土德王火伏而土興土  
上出金是魏滅而晉興之兆晉以金王也

兜鈴曹子歌

晉書曰明帝太和中京師歌兜鈴  
曹子其唱曰云云此詩妖也其後

曹爽見誅  
曹氏遂廢

其奈汝曹何



謠

明帝景初中童謠

宋書五行志曰魏明帝景初中童謠及宣王平遼東歸至

白屋當還鎮長安會帝篤疾急召之乃乘追鋒車東渡河終翦魏室如童謠之言也

阿公阿公駕馬車不意阿公東渡河阿公東還當奈何

東晉書作來

齊王嘉平中謠

宋書五行志曰魏齊王嘉平中謠按朱虎者楚王彪小字也王

凌令狐愚聞此謠謀立彪事發凌等伏誅彪賜死

白馬素羈西南馳其誰乘者朱虎騎

謠言

魏略護軍總統諸將任主武官選舉前後當此官者不能止貨賂故蔣濟為護軍時

有謠

言

欲求牙門當得千匹百人督五百匹

諺

諺言

太祖為魏王中尉崔琰取表草視之與楊訓書曰省表事佳耳時乎時乎會當有變

時琰本意議論者好譴呵而不尋情理也有白琰此書傲世怨謗者太祖怒曰諺言云云會當有變時意指不遜遂賜琰死

生女耳耳非佳語

夏侯語

魏書曰夏侯淵為將赴急疾常出敵不意故軍中語曰

典軍校尉夏侯淵三日五百六日一千

詩紀作六十千悞淵從太祖征

伐封博  
昌亭侯

軍中語

魏略曰太祖使盧洪趙達撫軍主刺舉軍中語曰

不畏曹公但畏盧洪曹公尚可趙達殺我

帳下語

江表傳曰典韋容貌魁傑名冠三軍其所持手戟長幾一尋軍中為之語曰

帳下壯士有典君手把雙戟八十斤

魏誌云曹公帳下有典君提一雙戟

八十斤

邢子昂語

魏志曰邢顗太祖辟為冀州從事時人稱之

德行堂堂邢子昂

白鶴

王子年拾遺記曰曹洪與魏武帝所乘之馬名曰白鶴時人諺曰

憑空虛躍曹家白鶴

諺

傳子曰劉曄仕明皇帝能應變持兩端帝後得其情遂疏焉曄遂發狂憂死諺曰

巧詐不如拙誠

語

魏氏春秋宗室曹冏上書請廣建同姓褒異宗室撰合所聞聚論成敗引語曰

百足之蟲至死不僵

以扶之者衆也

鴻臚語

魏略曰韓宣字景然為大鴻臚始南陽曲阜韓暨以宿德在宣前為大鴻臚及

宣在官亦稱職故鴻臚中為之語曰

大鴻臚小鴻臚前後治行相曷如

州中語

魏略曰賈洪字叔業馮翊敬危材學最高故衆人爲之語曰

州中曄曄賈叔業辨論洵洵敬文通

一作嚴苞字文通

京師語

魏書鄧颺字玄茂歷遷侍中尚書颺爲人好貨前在內職許臧艾授以顯官艾

以父妾與颺故京師爲之語曰

以官易富鄧玄茂

語

任昉別傳曰昉樂安博昌人風智早成故鄉人爲之語曰

蔣氏翁任氏童

楊阿若

魏志注曰楊阿若後名豐字伯陽少遊俠常以報仇解怨為事故時人為之號

曰

東市相斫楊阿若西市相斫楊阿若

諺

魏武選令曰諺曰云云昔季閭在白馬有受金取婢之罪棄而弗問後以為濟北相以其

能故

失晨之雞思補更鳴

諺

曹植令曰諺云云夫相者文德昭將者武功烈

相門有相將門有將

諺

梁祚魏國統曰王昶字文舒戒子書引諺曰云云

如不知足則失所欲

救寒無若重裘止謗莫如自脩

諺

王朗貧窶語曰諺曰

魯班雖巧不能為乞丐者顏

謗書

魏略曰李豐字安國為侍中僕射在臺閣常多托疾時臺制滿百日當解祿豐未滿

百日暫起已而復赴如是數歲及太傅宣王久病曹爽攝政豐依違二公間故時人有謗

書曰

曹爽之勢熱如火太傅父子冷如漿李豐兄弟如遊光

其意以為豐雖外示清淨而內圖事機有似遊光

謗書

魏略曰丁謚外似疎濫而內明慧雖與何晏鄧颺等并列而皆少之唯以聲勢屈於

曹爽爽亦敬之言無不從故于時謗書云

臺中有三狗二狗哇噤不可當一狗憑默作蛆囊

謂何

鄧丁也默者爽小字也意言三狗皆欲噉人而謚尤蛆囊也魏志默作點蛆作瘟

管輅言

華陽國志曰先主進攻漢中至定軍黃忠奪登山魏夏侯淵搦戰忠與法正定

計斬淵先是神卜管輅曾言於操曰云云操至是服其言按此本非謠諑而近讖且有韻



故附

三八縱橫黃猪遇虎定軍之南傷折一股

乃建安二十四年己亥正

月定軍在沔縣南淵與  
操為弟兄猶手足也

吳

歌  
王世容歌

吳錄曰王鐔字世容為武城令民服  
德化宿惡奔迸父老歌之鐔藝文類

聚作  
譚

王世容政無雙省徭役盜賊空

彭子陽歌

吳錄曰彭循字子陽毗陵人建國二  
年海賊丁儀等萬人據吳太守秋君

聞循勇謀以守令循與儀相見  
陳說利害應時散去民歌之曰

時歲倉卒賊縱橫大戟强弩不可當賴遇賢令彭子陽

謠

黃龍中童謠

周處風土記曰吳黃龍中童謠後  
孫權征公孫淵浮海乘船舶白也

行白者君追汝句驪馬

孫亮初童謠

晉書五行志曰孫亮初童謠按楊  
子闇者反語石子堦也鉤絡鉤帶

也及諸葛恪死果以葦席裹身篋束其腰投  
之石堦後聽恪故吏收葬求之此堦云云

吁汝恪何若若蘆葦單衣篋鉤絡於何相求揚子闇

揚

書作  
常

孫亮初白鼉鳴童謠

晉書五行志曰吳孫亮初公安有白鼉鳴童謠按南

郡城可長生者有急易以逃也明年諸葛恪敗弟融鎮公安亦見鼉融刮金印龜服之而死鼉有鱗介甲兵之象也

白鼉鳴龜背平南郡城中可長生守死不去義無成

會稽謠

吳書吳主亮被廢為會稽王孫休即位三年會稽近謠言云云而亮宮人告亮

使巫禱祠有惡言默為候官侯自殺

王亮當還為天子

建業謠

吳書孫休時張布與丁奉謀於會殺孫琳永安元年十二月丁卯建業中謠言

云云戊辰獵  
會緄入見殺

## 明會有變

孫皓初童謠

文選補遺作揚州歌晉書五行志曰吳孫皓初童謠按皓尋遷都武

昌民汭流供給咸怨毒焉按武昌記曰大帝築城江夏以程普為太守遂欲都鄂州改為武昌郡其民謠曰寧飲建業水不食武昌魚寧歸建業死不向武昌居繇是徙都建業則此又非孫皓初矣

寧飲建鄴水不食武昌魚寧還建業死不止武昌居

壽春童謠

江表傳曰初丹陽刁玄使蜀得司馬徽與劉廙論運命歷數事玄詐增其

丈以誑國人曰黃旗紫蓋見於東南終有天下者荆揚之君乎又得國中降人言壽春下有童謠云云孫皓聞之喜即載其母妻子及後宮數千人從牛渚陸道西上云青蓋入洛陽以順天命

# 吳天子當上

## 孫皓天紀中童謠

晉書五行志曰吳孫皓天紀中童謠晉武帝聞之加王濬

龍驤將軍及征吳江西衆軍無過者而王濬先定秣陵羊祜別傳曰先時吳童謠云云祜聞之曰此必水軍有功但當思應其名者耳即表濬為龍驤將軍濬小字阿童

阿童復阿童銜刀游渡江不畏岸上虎但畏水中龍

吳謠

吳志曰周瑜少精意於音樂唯三爵之後其有關誤瑜必知之知之必顧故時人謠

云

曲有誤周郎顧

有一作復

諺廣陵諺

張勃吳錄曰陸綢字伯羸為廣陵太守姦吏斂手廣陵諺曰

解結理煩我國陸君

時人語

高僧傳曰孫權已制江左而佛教未行有支謙者本月支人來遊漢境博覽經

籍莫不精究遍學異書通六國語其為人細長黑瘦眼多白而睛黃時人為之語曰

支郎眼中黃形軀雖細是智囊

異小兒言

晉書五行志曰孫休永安三年將守質子羣聚嬉戲有異小兒忽來言曰

云云又曰我非人熒惑星也言畢上昇仰視若曳一匹練有頃没于寶曰後四年而蜀亡六年而魏廢二十一年而吳平於是九服歸晉魏與吳蜀並戰國三公鋤司馬如之謂也

三公鋤司馬如

題門語

世說新語曰賀邵會稽山陰人歷散騎常侍出為吳郡太守初不出門吳中諸

強族輕之乃題府門云

會稽雞不能啼

賀聞故出行至門反顧索筆足之云於是至諸屯邱檢校諸顧陸役使官兵及藏逋亡悉

以事言上罪者甚衆陸抗時為江陵都督故下請孫皓然後得釋

不可啼殺吳兒

孫皓時詩妖

晉書五行志曰孫皓遣使者祭石印山下妖祠使者因以丹書巖口

云云皓聞之曰從大皇帝至朕四世太平之主非朕復誰恣虐踰甚尋以降亡近詩妖也

楚九州渚吳九州都揚州士作天子四世治太平矣



古樂苑卷四十七